

吉水縣志卷之三十一

藝文志

記目錄

宋

吉州新學記

歐陽修

重修儒學記

胡行簡

吉水修學記

劉辰翁

吉水義惠社倉記

劉辰翁

南岡禪寺記

劉辰翁



吉水縣除屯田租記

楊萬里

河口靈威廟記

楊萬里

崇寧備官記

蕭服

縣學魁星樓記

楊長孺

康王廟記

楊長孺

三忠祠記

周必大

振古堂記

周必大

吉州州學貢士莊記

文天祥

文山觀大水記

文天祥

元

吉水州儒學記

劉岳申

忠節祠記

揭傒斯

明

吉水縣儒學記

蕭受益

文丞相畫像記

王禕

儒學禮器碑記

歐陽衡

重修儒學記

陳宗舜

孝子亭記

陳宗舜

吉水州治記

李祁

南麓齋記

解縉

楊氏重修祠堂記

解縉

貞節先生蕭葵翁祠記

夏霖

城隍廟記

黃似山

重修宸奎閣記

劉儼

周文襄公祠記

陳善

燕岡義倉記

柯暹

芙蓉山房記

梁潛

孝子亭記

周敘

重修大成殿記

劉定之

吉水縣重修儒學記

王臣

吉水縣重修儒學記

羅璟

吉水縣學忠節祠記

彭教

縣學題名碑記

甯杲

瀟瀟瑞賢亭記

吳寬

厯溪潭記

周鳴

龔坊書院記

李中

下ノ鼎元

卷之三十一

三

吉水縣志卷三十一

吉水縣知縣長沙周樹槐纂修

藝文志

記上

宋

吉州新學記

歐陽修

慶歷二年秋天子開天章閣召政事之臣八人間治天下其道有可施於今者宜何先使坐而書以對八人者皆震恐失容俯伏頓首言此非愚臣所能及惟陛下所

欲爲則天下幸甚由是詔書屢下勸農桑責吏課舉賢才其明年三月遂詔天下皆立學置學官之員然後海隅徼塞四方萬里之外莫不有學嗚呼盛矣學校王政之本也古者治之盛衰視其學之興廢記曰國有學遂有序黨有庠家有塾此三代極盛之時大備之制也宋興蓋八十有四年而天下之學始克大立豈非盛美之事須其久而後至於大備歟是以詔下之日臣民喜幸而奔走就事者以後爲羞其年十月吉州之學成州舊有夫子廟在城之西北今知州事李侯寬之至也謀與

州人遷而大之以爲學舍事方上請而詔已下學遂已
成李侯治吉敏而有方其作學也吉之士率其私錢一
百五十萬以助用人之力積三萬二千工而人不以爲
勞其良材堅斲之用凡三十二萬三千五百而人不以
爲多學有堂講有筵有藏書之閣有賓客之位有游息
之亭嚴嚴翼翼壯偉宏耀而人不以爲侈旣成而來學
者常三百餘人余世家於吉而濫位於朝進不能贊揚
天子之盛美退不得與諸生揖讓乎其中然余聞教學
之法本於人性磨操遷革使趨于善其勉於人者勤而

入於人者漸故善教者以不倦之意須遲久之功至於
禮讓興行而風俗醇美然後爲學之成今州縣之吏不
得久於職而躬親教化也故李侯之績及於學之立而
不及待其成惟後之人毋廢慢天子之詔而怠以中止
幸余他日因得歸榮故鄉而謁於學門將見吉之士皆
道德明秀而可爲公卿問於其俗而婚喪飲食皆中禮
節入於其里而幼長相孝慈於其家行於其郊而少者
扶其羸老壯者代其負荷於道路然後樂學道之成而
得時從先生耆老席於衆賓之後聽鄉樂之歌飲獻酬

之酒以詩頌天子太平之功而周覽學舍思詠李侯之遺愛不亦美哉故於其始成也刻辭於石而立諸其廡以俟省志

重修儒學記

胡行簡

吉水州學視屬邑爲最盛創於宋天聖而增廣於元之至正地有仁山字水土生其間多秀而文數百年來忠節之士往往爲江右稱首壬辰兵變所至殘燬鄉閭邑居不能以復舊而學校爲尤甚章甫逢掖變爲甲冑典型文物蓋蕩然矣歲在丙午國朝遴選番陽費侯震知州事下車甫期月而化行政事修明僚佐輯睦平易不

撓民賴以安於是大懼士風不振聖教不興謀於同知
州事薛元義判官馬德明吏目胡延訓曰是邑也昔雖
文獻之邦而不治已久學爲本原風化之地吾屬當究
心焉乃命屬役於僚吏之能者董其事鳩材僦庸授以
成畫先及大成殿次及櫺星門講堂兩廡齋舍庖湍丹
蘄塗堊煥然一新而民不與其費不知其勞肖先聖先
師之像繪羣弟子與諸儒在從祀者悉循舊典明年八
月上丁集薦紳韋布行釋菜禮而落成之濟濟洋洋周
旋揖遜學之衿佩靡不翔集邦之士民靡不悅懌侯曰

黌宮告成職在勉勵爲國毓才以俟選舉無以開之曷
其牖之無以揭之曷其炤之遂出俸金爲賞及弟子員
若干相與校藝第其高下表其賢能而勉其不及使學
者得以優游砥礪益富厥能侯之用心可謂至矣復遣
儒士以書抵余曰願紀茲役以示多士余喟然嘆曰道
無古今之殊而學有古今之異先王之時其民則四民
也其居則六鄉三采三比四閭也其田則一井二牧三
屋九夫也其食則五穀六畜五牲三犧也其服則九文
六采五色五章也其官則二吏六聯五侯九伯也其教

則六德六行五禮六樂五御五射六書九數也民少而習之長而安焉奇器異物不能奪其心淫辭詖行不能移其性姦聲亂色不足以惑其耳目族間師友所講習罔匪堯舜禹湯文武周公孔子之道世降風移士鮮恒心不知聖賢所爲何事非溺於進取則急於勢利記覽而謂之學蹈襲而謂之文甚矣談天理以濟人欲者有焉何人心之不古如此方今吏州縣者鮮不以與學爲先務是文運一新之幾而諸君大有爲之日也且是邦素以忠節稱必有不教而善者乘運特出將使鳴國家

之盛昭前人之烈余何人也敢置言於聖人之前哉姑述侯之用心而推先王爲教之意俾刻諸石使士知所勉

吉水修學記

劉辰翁

曲阜遺履千餘年自漢高過魯祠始盛開元詔通祀則又盛慶厯置州縣學則又盛余嘗執俎豆於辟雍祭酒攝三公以衮衣北面庭燎煌煌佩玉鏘鏘工奏樂章搏拊笙簧其行事視先代帝王社稷宗廟上近年黜陟配享復增曾子子思下逮先儒與一時游從通諡在列東

南遍書院建官御書禮殿不特校庠序止此皆古所未
常有也吉水郡邑之一在多士爲最在賦籍爲小江岸
漂搖壬午大水稽天學存亡不計後三年有仁侯曰劉
煥至之日卽有意教養簿朱憲魯人材足達志每春秋
上丁與綏麟之日有事於先聖如魯而它廟上元之燈
民間江南之樂所以崇祀淫威者易彼於此觀聽易焉
峩峩而會者巖穴常數百拔奉充庖勸侑禮飲閱歲且
滿大議修學由長暨尉捐竭裨畫自殿而門自堂而序
精廬臚分列祠興秩開徑旁來星明戟幽規制宏新廼

像闕里初見晬容作會闕嚴馮負致美又以社壇接壤
修復種樹風雩遊息與學爲家教諭蕭維清實來請記
因爲之言教嗟乎此一時也又三百年所未有也樂始
於簣桴土鼓祭始於掃地燔兔豈不求諸野哉因三百
年之盛而又盛焉非過也而後有三歎於此者矣魯雖
周禮然絃歌不輟亦由武城遺風邑何可無賢宰之澤
哉事君者不敢忘其君亦不敢忘其祖古之得天下者
必問其所以失猝有問得失於子大夫者亦知之乎其
何以言之三代之得天下也以仁其失天下也以不仁